

書列所惡姓名以上人猶稱之曰奇男子云

巡撫應天右僉都御史周起元削籍以疏救同知楊姜悖旨曲庇及前劾朱童蒙也

乙丑天啓五年

正月庚戌朔左諭德繆昌期罷

辛亥許崔呈秀復官

甲寅給事中李魯生言朱童蒙疏論講李亡何例轉遽以病去皇上持旨留之而周起元亦疏至矣諸奸傾陷正人動曰中旨夫旨不自中而誰出哉執中為帝宅中者王而旨不得稱中必由汪文言之閔說王安之交通閣部之雷同而後

為旨則旨真外矣自小人得志屏逐忠良如阮大鍼陳爾翼張素養李嵩張捷等或例轉或病去願皇上再起之命召阮大鍼等

丁巳南京禮部尚書李維楨引疾去

壬戌戶部主事譚世講先任順天推官見劾遂奏辨下吏部重論

戊辰南京考功郎中王象春削籍以給事中陳維新糾之
壬申吏部舉卓異閔夢得等二十四人

甲戌改省善書院曰忠臣祠從給事中李魯生之請

前太僕寺少卿劉宗周削籍以矯情厭世也時削籍者並奪告身

乙亥董其昌為南京禮部尚書李養正為刑部尚書
左副都御史喬應甲言三朝輿論漸明略曰吏部職司用人
趙南星年老昏蔽為群小所欺舊淮撫李三才君子中其魔
術小人利其重賂世界三十年不使一日寧靜科臣章先儒
謂鄒維璉先營壘卿繼營督李遂入考功覆疏年例多出其
手汪文言罪人南星開釋葉向高題授中書代李三才營陞
非南星之欺皇上乎謝應祥推山西巡撫夏嘉遇于會推前
一日魏大中請嘉遇見署河南道袁化中非南星之欺皇上
乎陳九疇疏言謝應祥師也大中門生也高攀龍為南星京
房之門生師居太宰門生總憲為拾遺討用大中又用化中

化中入臺即保曹于汴等皆三才黨南星知之乎王德完忠
臣大中以德完會推不舉三才疏叅之南星知之乎會勘九
疇之疏同事則高攀龍案呈則鄒維璉矢口舉大中日品高
如山冰山乎太山乎嗟南星昏耄臣敢糾正如此
丙子禮部右侍郎何如寵引疾命閑住謂實錄未竣引疾規
避也

丁丑喬應甲言門戶略曰歷年救卜傳自言詹外廷不與焉
李三才任淮撫十三年加尚書謀大拜當年授意南道段然
疏有祖制廢弛已極內外登庸宜均蓋為三才地也嗣是議
論蜂起有保三才復有叅三才此門戶所繇分也後三才駐

私難掩又匿陳增稅銀出一奇策借勢顧憲成授閣部院三書書從宣大巡按吳亮封入疏內臣東林人也又保三才臣一言以蔽之曰不貪此東林之名所自來也有東林則有羽翼張問達假門內以翻局趙南星假門戶以固局乞皇上查段然吳亮之疏付之史館為門戶之証明日應甲又言科臣傅樞疏有李三才托汪文言行賄謀陞房可壯特薦取旨如寄可壯之薦三才云人言三才好推臣特患不好雄一時直臣交章叅劾王德完吳殿邦徐揚先周宗建皆叅三才與魏大忠為敵此外朱欽相劉弘化張捷徐景濂乞各疏付史館記之

戊寅慶陵成進孫承宗少師兼太子太師顧秉謙朱延禧少傅兼太子太師魏廣徵少保兼太子太傅廕中書舍人舊輔葉向高加上柱國朱國禎進少師兼太子太師內臣俱廕惟魏忠賢廕都督同知工部尚書柳佐等各陞賞有差已郊南京兵部尚書陳道亨罷

二月庚辰朔湖廣山東江西福建主考官方逢年等各鑄三級謫外以策問語譏刺也

甲申大學士顧秉謙魏廣徵主禮闈

大理寺丞徐大化言聖政宜常以攻趙南星遂命錄用何熊祥王永光朱一桂陸卿榮王伉秦聚奎汪慶伯徐揚先郭鞏

劉廷宣邵輔忠姚宗文范得志

丁亥貴州巡按御史傅宗龍言撫臣王三善大剛則折督臣楊述中太柔則廢易曰二人同心其利斷金今二人不能同心是以有輿尸之凶然撫臣全城捐軀即以功論可也謂督臣忌撫臣以為孤注兵無後勁糧餉不繼陷撫臣于死而督臣疏辯謂三釜斯蜡鴨池陸廣檄道將四路並進非以撫臣為孤注也至于悞聽奸猾之口言撫臣被執不死則督臣昧心之言也撫臣死矣督臣不可不議罰也

貢士童學顏准會試從大理寺丞徐大化之請

戊子御史劉廷佐鑄三級謫外以黨救考官也

辛卯偏沅巡撫右僉都御史李仙品太常寺卿李應魁順天府丞楊廷筠罷以南京給事中楊朝棟糾之時糾及王之臣魏忠賢以魏廣徵荐之言之臣邊才不易得仍任廣徵通內之札簽云內閣家報自惜薪司大監王朝用轉達

工部郎中徐在中免同官門洞開發其奸私仍聽勘

丙申巡按山東御史魏光緒以薦被察鄒縣知縣郭人吉謫之

辛丑命京堂自陳張鶴鳴申用懋王永光許弘綱商周祚俱需用從御史崔呈秀疏薦也

南京御史張錫命薦阮大鍼

乙巳戚臣李承恩下鎮撫司獄以擅用赭黃袍龍盒等承恩係世廟寧安公主子魏忠賢利其宅不應誘蒼頭以擅用蟒袍龍盒告東廠承恩方赴宴被執掠其家赭黃袍一實先年公主優人物色且渝竟論死

刑部右侍郎王之寀削籍御史楊維垣論其倖功冒進也

三月己酉朔壬子工部主事曹欽程劾周宗建私引邪黨張慎言慎言先任曹縣侵庫金三千後令石三畏查出劣處王官李應昇專護法東林黃尊素薦座師鄒維璉命並削籍宗建慎言仍命撫按追贓蓋慎言自壽張調曹令入臺繼任曹守勛後則石三畏三畏貪墨以文選郎中張元芳為慎言同鄉

疑其劣也故駭欽程劾之

癸丑王在晉為南京吏部尚書王永光為南京兵部尚書畢自巖為南京右都御史

劉璞涂世業黃公輔萬言楊廬化鰲并削籍以給事中霍維華論之

甲寅上幸太學內臣魏忠賢王體乾皆賜坐大臣不得賜茶丁巳烏撒叛目安效良寇害益熾方不克副總兵表善宣撫使沙源力戰敗之

戊午命逮募兵御史游士任下詔獄以給事中薛國光劾士任侵餉熊明遇黨庇也

御史喬承詔鑄三級誦以悞舉解經邦不遵旨回道託疾
終亥禮部左侍郎張爾引疾削籍謂詐疾要名也

甲子甘肅巡撫右僉都御史李若星削籍以汪文言引其五
千金開府也

乙丑御史崔呈秀頌魏忠賢指贖備城廩都督僉事賜勅以
旌

白所知為工部尚書管左侍郎事

壬戌前尚寶少卿下元薦卒長與人萬曆丙戌進士授中書
舍人數言事已亥中考功法庚戌起官遷禮部主事又言事
去以氣節講學名

丙寅策貢士賜余煌華琪芳吳孔嘉等進士及第有差

戊辰貴州總督蔡復一言將領故違節制土兵倡叛逃潰損
失二千餘人叅總兵魯欽劉超失律初欽超克嚴頭審乘勝
深入至織金敗績

命太監王敏政胡良輔封李倌為朝鮮國王道友島賜毛文
龍金蟒又金四萬蟒紵一百二十以備賞功

己巳太僕寺少卿王尊德言黔師大潰命提督移住遵義黔
撫更推

御史王大年薦范濟世徐景瀛岳駿聲從之並起原官

甲戌貴州總督蔡復一免以總督川湖兵部尚書朱燮元兼

貴州

李長庚為戶部尚書兼右副都御史巡撫天津督理糧餉
乙亥命逮楊漣左光斗袁化十魏大中周朝瑞顧大章同汪
文言訊之其受賄各官趙南星王之寀熊明遇惠世揚毛士
龍繆昌期鄒維璉黃龍光黃正賓鄧漢李若星盧化鰲徐良
彥錢士晉施天德並削籍命撫按勘問共追贖六萬金

談遷曰梟鳳不共音薰藉不共臭汪文言以胥史之賤貴
附王安其人何足數者或泣或笑託護國本投合善類群
噓兢詡諸君子獨不思元良久定羽翼何為即香舊如四
皓端謹如李泌無所容毫髮之力文言愾而貪國家事友

資彼擁植耶雖黨論辨鍛清流可濁而失足鼠輩借叢依
窟請間通貨不云全証人必自侮起諸君子於九原諒無
為辭責也

四月戊寅朔辛巳汪文言死於獄

甲申周應秋為刑部尚書協理部事

丙戌給事中霍維華言三朝慈孝無間一代實錄當確上是
之命毀監生楊維休私刻泰昌日錄

宥李可灼成

總督兩廣兵部右侍郎何士晉削籍給事中虞廷陞黃承吳
論其黨護王之寀

癸巳南居益為工部右侍郎總理河道王之臣為兵部右侍郎總督薊遼

戊戌阮大鍼為太常少卿余大成補職方郎中以給事葉有聲劾前大學士劉一燝關說行私命一燝削籍

庚子復王業浩游鳳翔御史高攀龍削籍鳳翔例轉廣州知府上言方高攀龍夤用臣有濫廢濫官濫起之疏故忌臣痛夏嘉遇外補也

甲辰前御史方震孺削籍逮入以給事中郭興治劾其黨比熊廷弼也

乙巳御史田景新劾貴州總督張我續及職方郎中方孔炤

削籍

五月戊申朔庚戌兵部尚書趙彥罷商周祚為兵部右侍郎總督兩廣朱欽相為右僉都御史巡撫福建

辛亥御史陳以瑞劾少詹事錢謙益及沈正宗俱削籍

乙卯命徵王之案贓二萬金還鄭養性京師從前刑部郎中岳駿聲之奏

浙江巡撫右僉都御史王洽罷

烏撒叛目安效良敗回至得勒值水西安邦彥兵至益倉復攻霏益效良者邦彥之親也順逆惟水西是視水蘭皆叛滇撫閔洪李以兵力不足暫糜之令擒賊自贖效良亦伴順擒

安應龍以獻至是見黔師出陸廣漢師入霑益有撫背扼吭之勢遂合霑水霑益安南諸部三十九營直攻霑益副總兵袁善宣撫使沙源力戰五日夜破走之

壬子右庶子葉燦无祿寺卿錢春遵化道按察使張光緒並削籍以御史門克新論其黨比仇正也

起王志道汪慶百並太常少卿劉廷元徐景濂郭如楚張捷並太僕少卿

御史崔呈秀請括保定河間民兵鎮江備倭軍需并追贖捐助於是檢括帑羨勒派助工陪京郡國所在騷然

丁巳詹事府禮部尚書翁正春罷

己未守制吏科都給事中劉弘化削籍南京太僕寺卿吳炯罷以御史石三畏劾弘化貪橫黨奸炯失身獻媚也

給事中楊所脩言三案宜做明倫大典命史臣成書以示天下

庚申賊至馬龍副總兵袁善擊破之斬二千餘級已犯尋甸又敗之

南贛巡撫右僉都御史李成名疏謝犯御諱免官

癸亥御史周維持糾趙彥及其子昌胤受劉惟忠陰附俱革

職張問遠招引王之案姑閑住周嘉謨倚庇王安削籍

乙丑上祀北郊回即幸西宛泛舟太液池身自刺舟二瑞佐

之相顧歡笑若登仙然忽風起舟覆俱墮水內豎譚敬入水
救上二璫皆淹斃

丁卯刑科給事中杜齊芳論南京太常少卿陳幼季衰冒勒
免

禮部尚書翁正春罷

庚午太常少卿甄淑削籍光祿少卿張光芳閑住以御史汪
裕糾之

禮部右侍郎徐光啓罷驗封郎中馮時來削籍御史智銓奏
光啓招練無功時來賍私狼籍也

辛未高第為兵部尚書

六月丁丑朔延安大風雪三日是歲大饑人相食

傳制各藩吏科都給事中陳熙昌冊封光澤王

戊寅御史宋師襄薦盛以弘以私濫謫外禮部尚書蕭雲舉
罷

巡撫延綏右僉都御史程鳳翀削籍廣東巡按御史胡良機
不候代出境削籍

庚辰濟南飛蝗蔽天落處秋禾蕩盡

辛巳太常少卿麻億罷御史陳世俊劾其邪黨

兵部左侍郎張鳳翔削籍奪廕御史陳朝輔劾之

壬午御史田景新糾次輔朱延禧

乙酉王紹徽為左副都御史起商周祚兵部右侍郎兼右僉都御史總督兩廣

丁亥御史李喬崙陳必謙前稽勲郎中張國紳並削籍以給事中潘士聞叅其邪黨

戊子大學士朱延禧罷

庚寅簡討姚希孟削籍南京光祿寺卿游漢龍閑住給事中楊所脩叅之

南京兵部左侍郎岳元聲罷

鄖陽巡撫右僉都御史畢懋康前吏部左侍郎李騰芳並削籍御史王際遠論之

司禮太監韓世祿劾

知縣唐紹堯貪墨忤法遣官逮之

大理寺丞劉思誨辨其枉被謫

壬辰黃汝良周如磐為禮部尚書署理詹事府

丁酉選庶吉士楊汝咸等十八人

前禮部尚書王圖巡撫保定右僉都御史程正己吏部主事

程國祥禮部主事趙昌運南京光祿寺少卿彭遵古御史李

日宣並削籍御史劉弘光劾其黨邪之原

起陳于庭補廣西道姚祚端補福建道王雅量補四川道游

鳳翔補南京廣東道御史

庚子九門提督太監金良輔劾御史倪文煥擅杖官軍上責

之 吏部
司

劉行義王任杰罷御史周維持參其

前御史田一甲言臣前糾孫津李三才胡忻朱光祚等今值
纂脩之候豈容遁于一字之吝敕命宣付史館工部尚書朱
光祚太常寺少卿胡忻削籍錄一甲京堂

七月丁未朔南京刑部尚書胡應台罷御史莊謙劾其黨

楊漣周朝瑞左光斗魏大中顧大章袁化中下詔獄令五日
一訊徵贓方震孺下刑部獄

辛亥太僕寺卿韓策汪先岸削奪官誥御史袁鯨參策為南
星所引先岸與文言同宗也

癸丑北鎮撫司許顯純奏請楊漣等送法司追贓定罪諭以

楊漣等黨比熊廷弼淪沒封疆且納賄招權移宮一事陷朕
不孝罪惡滔天許顯純等何擅求送部仍嚴比不得寬縱
諭刑部罪囚陶朗先游士任方震孺唐紹堯等角巾色衣非
法於是主事林曾引罪

給事中杜齊芳請卹故貴州巡撫王三善不許

欽人蔣應陽嘗事熊廷弼授守備至是候廷弼於獄東廠誣
執之以入獄營謀命重論魏忠賢以緝奸功加廕一級
封容妃任氏

前太僕寺少卿何棟如戍滁州以募兵于浙使遼東侵餉也
庚申前左副都御史楊漣卒於獄漣應山人萬曆丁未進士

今常熟治最擢給事中歷今官負氣節賈往敢任獄卒承指
盆死之有絕筆同獄孟淑孔藏馬許顯純并殺淑孔又火其
血書珠商某記之得傳血書云連今死杖下矣癡心報主愚
直仇人不為張儉逃亡亦不為楊震飲藥欲以性命歸之朝
廷不面妻子一環泣耳訊問之時枉坐賍私殺人獻媚五日
一比家傾路遠交絕窮途身非鐵石有命而已雷霆雨露莫
非天恩仁義一生死于詔獄難言不得死所惟我身受顧命
託孤寄命臨大節而不可奪持此一念可以見先帝對二祖
十宗與天下萬世矣連沒仍下撫按錄其家德安知府李行
先設簿募完應山知縣夏之彥捐資助約崇禎初贈右都御

史加贈太子太保謚忠烈

陳仁錫曰痛哉楊公刀鋸殺之生前借題殺之死後勒追
以殺子孫塗抹以殺青史邪橫以殺人心其奈人倫天道
何然子孫賢不可殺青史嚴不能殺人心活不敢殺則亦
自殺其心而已卒之全給謚廕建祠賜額而後知楊公之
死死而生矣向之論、訛、自謂生榮者今安在哉
談遷曰詔獄諸君子楊文孺氣最勦禍最惜而死亦先之
方其兵垣上書先廟特召對預於顧命瑣臣之奇遭孰逾
文孺宜感奮而不顧其身也排闥定位移宮避嫌俱首自
文孺真有杜延年李固所不敢望者事定之後諸人影附

響集欲共其功議論相尋始而衍中而激末而潰於朝廷不
惟蛇之足且為集之聲矣嗚呼文孺自足死餘死者即同難
或未同其心也

前御史康丕揚上言聖政日新諭以丕揚為沈一貫鷹犬今
借端圖用下延議

甲子兵部右侍郎李邦華吏部員外郎周順昌並削籍毀其
講學書院御史倪文煥劾其東林巨魁也

丁卯吏部尚書崔景榮罷命以李宗延代之

癸酉前大孝士韓爌削籍

給事中李魯生請赦下不拘資序蓋陰為火房事魏庶徵地

也

薛三省為禮部尚書

八月丁丑朔御史石三畏追論辛亥丁巳京察上以刑黨李三
才顧憲成曹于汴諸臣已故追奪誥命見在者削籍仍奪告
身

辛巳追奪故戶部郎中李樸故刑部郎中于玉立贈官以御
史安伸言也

毀天下書院削奪鄒元標孫慎行馮從吾余懋衡官誥罷鄭
三俊畢懋良以御史張訥言也

前史料都給事中魏大中卒於獄嘉善人萬曆丙辰進士自

行人擢給事中歷工戶禮三垣崇禎初贈太常寺卿謚忠節
談遷曰魏孔時好立廉隅居嘗韋布峭厲絕俗意見褊滯
能當其意則踴躍為庶識拘而跡峻一見汪文言好情偽
貌遽相激賞汲引同輩來此紛紜雖面自無愧而追原禍
始要自有繇長子學泚扶其柩歸得疾死後議者并以孝
旌凶事偶會務極標榜嗚呼東漢黨籍其家人獨無死者
乎何以當時失傳也

甲申以緝奸人蔣應陽功加廣魏忠賢一級

前左僉都御史左光斗卒於獄桐城人萬曆丁未進士自中
書舍人擢御史歷今官同邑阮大鍼與魏大中爭掌吏垣不

得大鍼遂附馮銓傾光斗等崇禎初贈左副都御史錄一子
太學弘光時謚忠毅

談遷曰左中丞被禍同於楊魏等崇禎更化獨斬其易名
末年奏請天子詰所以待者一時不敢明其說予嘗聞之
士大夫中丞在西臺多通少介視畿輔學政不絕請託故
較諸人有遺議焉然其大節煥然人目矣

戊子諭內閣曰朕自去歲以來屏逐兇邪厲精圖治而秉軸
大臣莫為分猷共念如楊漣左光斗等移宮一事背先帝之
深恩陷朕躬于不孝又能延弼等喪遠辱國寸斬尚有餘辜
而楊漣左光斗各納賄求脫即五刑不足以伸其法而在朝

大臣持祿養交徇私避禍但顧子孫之計不圖社稷之安朕方率循舊章而曰朝政日亂朕方祖述堯舜而曰大不相侔致言路各官承望風旨緘口結舌無敢聲明其罪國家養士竟何賴焉自今以後務改過自新共維國是掃清門戶專力封疆再有陰懷觀望借題報仇或捏蜚言希圖翻案朕按祖宗紅牌治以欺君之罪

周如磐以原官兼東閣丁紹載黃立極為禮部尚書馮銓為禮部右侍郎並兼東閣大學士

乙未前御史袁化中卒于獄武定州人萬曆丁未進士誣坐贓六千金崇禎初贈太僕寺卿廕監弘光時謚忠愍

高汝棻曰狄梁公承反而人服其智諸公承贓而死人固有幸不幸焉說者謂追比之日何不一死嗟乎鉤黨禍起陳蕃劉劭李雲謝弼之儔死掠案者不可勝數虞詡一日之中傳拷四獄吏勸自引誦曰寧服毆刀以示遠近假令當時有求多者引繩批根不休幾不得與絕吭之息夫躬爭優劣矣今視數公何如也悲夫

戊戌王紹徽為左都御史徐大化為左副都御史吳崇禮為南京刑部尚書

大孝士魏廣微予告廣微既罷相具厚禮于魏忠賢王體乾等及至家又各以厚餽彌縫之恐呈秀等下石也

禮部尚書林堯俞罷

殺蔣應陽先一日日講畢輔臣丁紹軾等進有像遼東傳俱云此熊廷弼作此飾功冀生也上覽之怒諭內閣亟加高觀之誅庶快萬民之憤

壬寅殺經略兵部尚書熊廷弼傳首九塞時刑部山東司主事張時雍奉駕帖至獄廷弼知有異擲沐出紈囊一謝疏時雍曰爾不讀李斯傳乎囚安得上書廷弼曰此趙高言也廷弼江夏人萬曆戊戌進士授保定推官進工部主事以御史按遼卜其變後宣慰遼東進侍郎再鎮遼每就讞王化貞賂市人群詢廷弼頌化貞流聞大內其寃終崇禎朝不白初生

駐十七萬妻陳氏繫辱縣廷江夏知縣夏爾玉索其子貂裘帽者布古玩不遂脅之長子北璉自刎崇禎初己巳次子北璠訴寃大學士韓爌揭奏始收葬

高汝栻曰廷弼慷慨揮霍有餘涵養則不足高言雄氣不肯下人世多以剛愎虛憍目之自有遼事以來再任經略不取一金錢不通一餽閔終日焦唇敝舌與人爭言大計視國如家第以經撫見左復與中樞風怒動輒掣肘憤激坐視遂膺顯侮悲哉然當事者亦無意即殺自楊左起而廷弼之死決矣故曰廷弼不死於封疆而死於時局不死於法吏而死于奸璫也璫謂不以封疆申殺官則不能創

大獄不以封疆受賄誣諸臣則不能作清流之陷穿不殺
廷弼則不能借題追賍加諸臣以身後之誅夫討悞封疆
伏法何辭然終不死於封疆而死于時局不死于吏議而
死于奸璫是以九泉之下目不瞑耳

談遷曰吳殺伍子胥宋殺岳武穆亡國培敵冤痛如新熊
氏之再燃於垂燼補漏救焚吃馬金湯令得究其用即全
疆未復何至捐河東而棄之矢不祚明有王化貞以角又
袒以福清及事在司敗於廷弼意錮之於化貞意奔之然
則殺廷弼者獨逆璫之罪哉福清先其意逆璫後其權也
廷弼死鎮遠者益非其人早其詞誕其說為狡為黷為莠

為餒計必盡擲之於強隣而社稷隨之矣嗚呼不意當今
古而冤痛如子胥武穆也

太監李永貞叙殿門功自閣臣外東廠太監魏忠賢司禮太
監王體乾等協理侍郎胡世賞巡視科道楊夢宸崔呈秀郎
中李養浩等

太僕少卿田生金免

九月丙午朔丁未前太僕寺少卿周朝瑞卒于獄臨清人萬曆
丁未進士崇禎初贈大理寺卿廕監弘光時謚忠毅

辛亥呂兆熊為戶部尚書總督倉場

大理寺卿曹珍罷給事中潘士聞論其給假曠官也

壬子給事中吳國華糾曹欽程周詩雅熊江之貪險上以欽
程在陵不問詩雅江及國華以徇私並削籍

癸丑御史吳之仁巡閱引疾命開位

甲寅前登萊監軍僉事佟卜年卒于獄初卜年任河間知縣
有政聲熊廷弼薦為監軍佟永年為前鋒叅將壬戌四月張
鶴鳴行邊誣通建州遂逮詔獄無實坐流時惡廷弼併及卜
年下刑部獄刑部主事張時雍矯詔迫自盡諸子亡依遂從
熊氏歸楚

丁巳前兵部左侍郎孫居相尚寶司丞史記事並削籍給事
中虞廷陞論其黨李三才也

前南贛巡撫梅之煥以出趙南星之門削籍給事中陳序糾
之并言孫居相賄膺節鉞託言問餽至二萬一千有奇又票
取共金九十餘兩命撫按逮訊追贓

戊午總督河道工部右侍郎南居益削籍給事中黃承玄論
其倚黨躡陞也

起邵輔忠順天府丞姚宗文太常寺卿亦詩教趙與邦給事
中李微儀牟志夔御史

右僉都御史楊鶴御史江秉謙夏之令削籍起蘇琰余合中
林一桂原官以御史卓適糾薦也

癸亥禮科給事中解學龍編修侯恪削籍御史智銓糾之

丙寅督輔孫承宗發兵襲耀州初三至河南藍塲堡遣人勸
其地者益苦之多逃因圍其外者陰乞師副總兵魯之甲
請乘巡河為計承宗令前鋒參將李承先左輔及之甲自右
屯抵三岔河約水將金冠姚與賢丁郊渡柳河會二家溝庚
午初兵部尚書高第與孫承宗相左總兵馬世龍以第指止
師姚與賢等水師不至承宗不知也惟金應傑以漁艇七至
遂渡之三日渡纔八百騎屯河畔泥窪中不能立敵悉甲出
葦荻間來薄承先射死之甲錢應科自溺兵騎失亡者半左
輔自上流至舡城舡城人趁固山一甲士數十救生口五百
有奇還師忌者諱言遼之精銳十萬俱盡兵部尚書高第謂

魏忠賢伏地而哭忠賢薄之

郁士俊曰此時舡城近東北敵聞變遑遽思道無暇南下
若非忌者見阻則蓋耀竟可復也惜哉

談遷曰柳河之役亦東征一音也自遼難以來我曾無片
甲翱翔乎河上敵志積偷今且直搗耀城諸校畢至得賈
勇先登足褫其魄而將相失權謀同築舍一人鼓之十人
撓之幸其敗以自全嗚呼將相調和則士豫附自古識之
矣

丁郊給事中霍維華請採開化縣雲霧山之木
御史張鯉劾奪官誥以風聞妄奏也

士戌前吏部尚書崔景榮削籍御史倪文煥劾之
御史夏之珍劾毛文龍幾悞封疆命逮之令及中書舍人吳
之瑞海運通判吳世科並下詔獄世科以千金寄弟之瑞事
覺後並戍

癸亥顧秉謙推周道登纂修實錄不許以黨人削籍

前武庫員外郎顧大章卒于獄常熟人萬曆丁未進士前為
刑部主事時稍右廷弼祖化貞者怨之遂株及坐駐四萬崇
禎初贈太僕寺卿弘光時謚裕愍

南京尚寶司卿傅宗臬以邪黨削籍

壬申在告兵部右侍郎李瑾禮科給事中劉懋削籍御史趙

胤昌論之

括南京大內舊銅鑄錢

賜魏忠賢客氏金印各一篆曰欽賜顧命元臣忠賢印欽賜
奉聖夫人客氏印各重二百兩初萬曆中兩宮灾燬皇后之
寶竟未補造而闕媪特給可異也

逮惠世揚仍追楊漣左光斗周朝瑞魏大中袁化中顧大章
遺賍後世揚論死

癸酉李從心為工部尚書總督河道

甲戌兵部左侍郎王國禎以踰年不任南京兵部右侍郎岳
元聲以邪黨並削籍

直隸巡按御史俞思恂奏留鳳陽巡撫呂兆熊不許並罷之
十月丙子朔皇子慈炆生容妃任氏出進任景春錦衣正千戶
庚辰南京光祿寺少卿文翔鳳吏部選司員外郎謝三選錫
三級誥

被察御史康丕揚戍邊初丕揚疏辯楚籓妖書二事上以掃
門推相邪媚貪酷久掛察典削籍未盡其辜戍之

福建巡撫右僉都御史朱欽相薦龍溪貢士張燮學行

壬午兵部尚書高第經略遼東宣至文華殿賜尚方劍及蟒
王金綵

癸未詹魏忠賢都督僉事

庚寅霍維華為太僕寺少卿

甲午王永光為兵部尚書

乙未刑部右侍郎朱世守大理寺丞楊一鵬山西巡撫劉策
布政使陸完學俱削籍御史潘雲翼糾其東林遺好也

兵部職方主事徐日久削奪官誥以妄奏總兵馬世龍也

督師大學士孫承宗罷總兵馬世龍免職方主事徐日久削
籍以妄薦世龍誥之也承宗雖嫻于兵而方畧亦疎馬世龍
便給璫流非大將才畧以重任人多議之

己亥前登萊巡撫右僉都御史陶朗先卒于戡

壬寅許弘綱為南京兵部尚書

經略遼東兵部尚書高第互鎮檄錦右寧前之兵指關外地四百里寧前道副使袁崇煥爭之力止罷錦右之戍及屯田兵民入關

十一月丙午朔己酉進任氏為皇貴妃進任景春為都督同知任應登錦衣百戶御史邢紹德糾周如磐妻喪不朝賀大不敬

庚戌南京工部主事劉忠選劾葉向高晏薦孫慎行

辛亥經略高第以戶部主事田吉改兵部職方主事督畫

編修陳子壯及父吏科都給事中熙昌削籍子壯以甲子主試浙江程錄有庸主失權英主攬權語坐謗訕也

癸丑大學士周如磐罷

南京戶部員外郎胡芳桂言為胡永順陸師贊易應昌誣陷並削籍

寧夏巡撫右僉都御史郭之琮罷御史余城劾之琮妄議採銅也

巡撫遼東右副都御史喻安性罷

庚申逮揚州知府劉鐸：以詩箴贈僧本福云髻彈木邊崇山前鳥欲飛各人頭戴笠有執項流緋陽至君恩重陰來國事非崇禎明聖出火木好垂衣本福走京師錦衣衛田爾耕緝為譏訕并逮鐸

庚午御史王時英劾湘江巡撫右僉都御史劉可法躐升前
文選司郎中唐暉貪婪並削籍

辛未兵部右侍郎唐世濟太僕寺少卿張潑通政使王孟震
布政使李守後叅政蔣謹並削籍御史田景新梁夢環劾之
癸酉前文選郎中莊欽隣太僕少卿孫之益太常寺卿陳伯
友大理寺丞蕭毅中並削籍御史張樞糾之

甲戌刑部主事彭叅言東林黨蔽上以叅原左光斗私人遂
與陳鑪徐日升並削籍

南京兵部右侍郎蕭近高前刑部尚書喬允升開任給事中
薛國觀糾之

太僕少卿潘文罷

十二月乙亥朔丁丑督理屯田右副都御史董應舉罷

巳卯前太僕少卿馬孟禎河南米議韓萬象前吏科左給事
中方有度並削籍御史王業浩糾之

稽勲郎中劉廷諫文選員外郎孫必顯大理寺少卿韋蕃並
削籍御史陳膺謨糾之

辛巳吏部尚書李宗延刑部尚書李養正罷

癸未文選郎中金世俊江西按察使朱萬鍾王繼謨並削籍
世俊下撫按追贓御史倪文煥糾之

禮部左侍郎周炳謨以前薦王之寀勒致仕大理寺丞張廷

拱以鑽營並削籍御史石三畏糾之并罷南京工部尚書沈
傲炳

乙酉御史陳世俊劾南京兵部右侍郎郝名宦太僕寺少卿
羅汝元光祿寺少卿王國瑚邪臣倖進並削籍

丁亥禮部尚書薛三省罷

戊子太僕寺少卿歐陽調律前御史翟學程削籍禮部左侍
郎公鼐罷給事中葉有聲糾之

廣西巡撫右僉都御史董元儒太僕少卿倪應春削籍御史
何可反糾之

御史盧承欽劾大理寺卿曹珍狎主邪盟屯田右副都御史

董應舉侵撓鹽政給事中李遇知薦舉獻媚並削籍

遼東巡撫喻安性削籍薊鎮巡撫申用懋閑住直隸巡按御
史洪如鍾糾之

己丑王紹徽為吏部尚書

癸巳戶部主事李柱明盜北新倉粟下詔獄

御史趙胤昌劾大學士丁紹載模稜反覆如柳河之敗議馬
世龍去留不決也

乙未大理寺方少卿吳之皞胡廣巡撫舒榮都御史鄭宗周

工部員外郎何顯宗並削籍給事中潘士聞糾之

前吏部尚書趙南星戊振武衛子清衡戊莊浪衛

丁酉大學士周如磐卒于京師莆田人戊戌進士 見後

御史練國事李玄王祚昌霍鏐楊新期並削籍給事中趙興

戊戌李嵩為右僉都御史巡撫登萊

應大府尹談自省刑科給事 賴 佐南京禮部主事張篤

敬並削籍御史 弘 糾之

太僕寺少卿劉蘭吏部郎中呂維 工部郎中呂克孝南京

戶部郎中董述並罷御史陳以瑞糾之

南京通政使魏時應前稽勲郎中戴澳除名御史何廷樞劾

之



臺灣國家圖書館, NATIONAL CENTRAL LIBRARY, TAIWAN